



ХҮҮХДИЙН ТӨЛӨӨ ҮНДЭСНИЙ ЗӨВЛӨЛИЙН ТОГТООЛ

2018 оны 12 сарын 03 өдөр

Дугаар 03

Улаанбаатар хот

Хүүхэд хамгааллын чиглэлээр
баримтлах бодлого, чиглэл батлах тухай

Монгол Улсын Хүүхдийн эрхийн тухай хуулийн 16 дугаар зүйлийн 16.4.1, 16.4.2 дахь заалтууд, Хүүхдийн төлөө үндэсний зөвлөлийн дүрмийн 3 дугаар зүйлийн 3.1.3 дахь заалтыг тус тус үндэслэн ТОГТООХ нь:

1. Хүүхэд хамгааллын бодлогын жишиг баримт бичгийг нэгдүгээр, байгууллагад эцэг эхийн зөвлөл байгуулж ажиллах зөвлөмжийг хоёрдугаар хавсралтаар тус тус баталсугай.

2. Хүүхэд хамгааллын бодлогын жишиг баримт бичиг, эцэг эхийн зөвлөл байгуулж ажиллах зөвлөмжийг хэрэгжүүлж ажиллахыг төр, хувийн хэвшлийн байгууллагуудад даалгасугай.


3. Тогтоолын хэрэгжилтийг хангаж, төр хувийн хэвшлийн байгууллагыг мэргэжил, арга зүйгээр хангаж ажиллахыг Гэр бүл, хүүхэд, залуучуудын хөгжлийн газар/О.Алтансүх/-т үүрэг болгосугай.

МОНГОЛ УЛСЫН ЕРӨНХИЙ САЙД,
ТЭРГҮҮН



Ү.ХҮРЭЛСҮХ

Хүүхдийн төлөө үндэсний зөвлөлийн 2018
оны 12 дугаар сарын 03-ны өдрийн 03 дугаар
тогтоолын 1. дүгээр хавсралт



ХҮҮХЭД ХАМГААЛЛЫН БОДЛОГЫН ЖИШИГ БАРИМТ БИЧИГ

Энэхүү баримт бичиг нь Монгол Улсад үйл ажиллагаа явуулж буй бүх байгууллагууд, хуулийн этгээдэд хамаарна.

НЭР ТОМЪЁОНЫ ТАЙЛБАР:

1. Хүүхэд: 18 нас хүртэлх хүн¹
2. Хүүхэд хамгаалал²: Нийгмийн бүх орчинд хүүхэд бүрийг үл хайхрах байдал, дарамт, хүчирхийлэл, мөлжлөгийн бүх хэлбэрээс, эрсдэлт нөхцөлд өртөхөөс урьдчилан сэргийлэх, хариу үйлчилгээ үзүүлэх зорилготой олон талт, цогц мэргэшсэн үйл ажиллагаанаас бүрдэнэ.
3. Хүүхдэд ээлтэй байгууллага: Бие махбод, сэтгэл санааны, бэлгийн болон үл хайхрах хүчирхийллээс (байдлаас) хүүхдийг хамгаалах үзэл санаа, үйл ажиллагааг өөрийн байгууллагын бүх түвшинд нэвтрүүлсэн, дадал болгосон, дотоод журамдаа тусгасан, байгууллагын соёлд нэвт шингээсэн байгууллага.
4. Хүүхэд хамгааллын бодлого: Хүүхдэд учрах эрсдэл, хор нөлөөнөөс сэргийлж, хамгаалахын тулд байгууллага бүр анхаарал тавьж байгааг нотолсон баримт бичиг. Үүнд хүүхэд бүрт аюулгүй, эерэг орчин бүрдүүлэхийн тулд байгууллага, ажилтнууд, сайн дурын идэвхтнүүд болон бусад холбогдох хүмүүс юуг анхаарах ёстойг тусгасан байна
5. Эрсдэлт нөхцөлд байгаа хүүхэд³: Эрүүл мэнд, амь нас, аюулгүй байдал, хөгжих хэвийн орчин нь алдагдсан, эсхүл асран хамгаалагч, харгалзан дэмжигч, хууль ёсны төлөөлөгчгүй, эсхүл гамшиг, онцгой байдлын нөхцөлд байгаа хүүхэд
6. Хүүхдийн эсрэг хүчирхийлэл⁴: Санаатай эсхүл санамсаргүйгээр хүүхдийн амь нас, эрүүл мэнд, хөгжил, бие махбод, сэтгэл санаанд хор хохирол учруулах үл хайхрах байдал, бэлгийн зүй бус үйлдэл болон бие махбодийн шийтгэл, сэтгэл санааны дарамтыг хэлнэ. Хүчирхийллийн хэлбэр:
 - бие мах бодын хүчирхийлэл
 - сэтгэл санааны хүчирхийлэл
 - бэлгийн хүчирхийлэл
 - үл хайхрах
7. Бие махбодийн хүчирхийлэл: Хүүхдийг өөрийн эрхшээлдээ байлгах, давамгайл байдал тогтоох, шийтгэх зорилгоор хэн нэгэн этгээд хүч хэрэглэн хүүхдийн биед халдсаныг эсхүл энэхүү нөхцөл байдлыг мэдсээр байж хүүхдийг хамгаалах болон урьдчилан сэргийлэх арга хэмжээ аваагүй зэргийг хэлнэ.
8. Үл хайхрах: Зохистой хоол унд, хувцас, орон байр, эмнэлгийн тусламж боловсрол эзэмших зэрэг хүүхдийн үндсэн хэрэгцээг хангаж чадахгүй байхыг хэлнэ.
9. Сэтгэл санааны хүчирхийлэл: Асран хамгаалагчийн зүгээс хүүхдийг үнэ цэнэгүй, согогтой, чамд хэн ч хайргүй, чамтай хамт байхыг хэн ч хүсэхгүй гэж ойлгуулах, айлган сүрдүүлэх, хэл амаар доромжлох, загнах, гутаах зэрэг үйлдэл юм.
10. Бэлгийн хүчирхийлэл: Хүүхдийн халдашгүй дархан байдал, бэлгийн эрх чөлөөг зөрчсөн бэлгийн харилцаанд оруулахаар завдсан, оруулсан, бэлгийн болон садар самууны шинжтэй бусад үйлдэлд уруу татсан, шаардсан, энэхүү нөхцөл байдлыг мэдсээр байж хүүхдийг хамгаалах болон урьдчилан сэргийлэх арга хэмжээ аваагүй зэргийг хэлнэ.
11. Хүүхдийг садар самуунд ашиглах⁵: Бэлгийн амьдралыг харуулан дүрслэн бичсэн бичлэг, видео бичлэг, зураг бүтээхдээ хүүхдийг оролцуулах үйлдэл

¹ НҮБ-ын Хүүхдийн эрхийн конвенцийн 1 дүгээр заалт

² МУ-ын Хүүхэд хамгааллын тухай хуулийн 2 дугаар зүйлийн 2.2 дахь хэсэг

³ МУ-ын Хүүхэд хамгааллын тухай хуулийн 4 дүгээр зүйлийн 4.1.1 дэх заалт

⁴ МУ-ын Хүүхэд хамгааллын тухай хуулийн 4 дүгээр зүйлийн 4.1.8 дахь заалт

⁵ МУ-ын Эрүүгийн тухай хуулийн 16 дугаар зүйлийн 16.8 дахь хэсэг

⁶ МУ-ын Хүүхэд хамгааллын тухай хуулийн 4 дүгээр зүйлийн 4.1.6 дахь заалт